

Edgard Robby Burleson, honra pa expo "Lens di mi wowo"

Ni maestro di Wiskunde ni electrician: Reportero y fotografo d DIARIO pa casi 35 año largo



"Bon nochi damas y caballeros: na promer lugar un danki grandi pa sr. Leo vrolijk kende awe, cu su di 8 año cu ta organizando e exposicion "E lens di mi wowo" y tambe

sr. Pierre Rafini director di RBC, cu semper a duna nan confianza pa un biaha mas pa organiza e actividad aki. Dunando un relato cortico despues di a termina mi estu-

dio na Lagerschool na st. Dominicus College, mi a sigui pa la Salle College, despues pa lts John F Kennedy School. Mi a scoge pa bay den e ramo di Electricien, despues di a termina na lts mi kier a sigui studia y mi a bay Hulanda y mi a establece mi mes mas o menos 11 año. Mi a bai MTS. coi un pakete di Wiskunde pa mi por bira Maestro den wiskunde. como mi no kier keda sin hasi nada durante dia mi a tuma un reto den fotografia. Mi a haya e reto ey hopi bon tey cu mi a bay traha un par di tempo na Algemeene Dagblad na Rotterdam y yuda mi ruman homber kende nan tabata traha cu e Stichting yudando e Arubianonan cu problema pa haya cas. Mi a sinti e trayectoria cuminsa bira pisa cu tur locual mi tabata hasiendo: traha den dia y school anochi. Durante e ultimo año di mi estudio mi a cuminsa solicita na Aruba pa bin traha; cos no a bai asina facil pa mi por a haya trabao na Aruba, mi a give up di pa bira maestro di schol. Mi a keda Hulanda sigui yuda den socialewerker na Hulanda. Mirando cu 11 año a pasa na Hulanda mi a cuminsa fada m'a dicidi toch pa bin Aruba. No tabata facil pa a haya un trabao na Aruba, mi di cu mi mama, awe difunto, kico mi a bin haci berdad na Aruba cu no tin trabao a drenta mi un curashi pa solicita pa un trabao loke sea. Pa mi sorpresa mi a bin haya un trabao cu un compania macamba den a ramo di Electricien. Mi promer trabao tabata nan a manda mi bai traha instala alarma na un banco cu tabata establece den caya grandi. Anochi mi tabata ocupa mi mes bai mira na unda tin deporte. Sea baseball, futbol, basketball, mi no sa kico a drenta den mi cabes ata mi a worde acerca pa Johnny Garcia pa forma parti den formacion pa referee di basketball. Ata mi tur anochi riba cancha di basketball ta fluit wega y hasta bay den exterior pa fluit wega, entre otro corsow: weganan di basketball Copa antilliano na venezuela. Awe, mayoria di e atletanan ta hendenan, entre otro, Gobernador di Bonaire, dokter, abogado maestronan di school, polis aunque nan tabata un tiki fastioso riba tere- no tog mi a sa di domina nan.

Awe, nan tur a keda cu un bon amistad cu mi y unda cu mi topa cualkier di nan, nan ta corda con streng mi tabata cu nan riba tereno. Despues mi a cuminsa mors den baseball bay tur weganan di little league te cu awe mi tin mas cu 20 año den directiva di Center League. Con mi a drenta den e ramo di periodista? Mi a cuminsa traha cu la prensa bao guia di tom pietersz aki na Aruba, pero na año 1980 mi a worde acerca pa sr. Harry Croes y Richard Tromp, kendenan a pidimi si mi kier bin traha cu un corant di Aruba mes y cu ta worde geprint na Aruba. Cos no a bai asina facil pa acepta mesora; a tuma mi tempo pa pensa, pero Harry a bolbe acerca mi, bisa mi nos mester pa bo bin y sr. Jossy mansur kier papia cu mi. Combersacionnan ta bin y bai ainda mi no kier a tuma decision te un dia mi a bisa Harry ok, mi ta pasa bin mira con nan sistema ta drei, paso mi a mira un drukkerij na Hulanda caminda cu mi a traha un par di año a coopera cu esun di Aruba, mi tuma e challenge ey. Ata mi dia y anochi na Diario promer cu e prome ehemplar subi plaza, tabata tin cu mula; cu ya mi no a spera di tabata asina. Dia cu nos a sinta hunto organiza un fecha pa e promer ehemplar mester ta riba caya tabata 3 di November 1980. Wel, te dia di awe aki dos luna 3 di November 2015 mi ta cumpli 35 año trahando cu Diario y den mi trayectoria como periodista mi tin mas o menos 40 año en total. Awe mi ta felicita tur e miembronan di prensa riba nan dia promer di September. Dia cu mi a cuminsa bo por a conta nan riba bo dede pero awo- raki dificil bo sa kendenan ta.

Shonnan pabien riba boso dia. Un danki mi ta manda pa sr. Harry Croes, Richard Tromp kendenan a pone mi te cu dia di awe ainda ta labora na Diario. Mi no por keda sin menciona sr. Jossy Mansur y sra. Nuhad Mansur, yiunan Jossito, Luis Miguel, Eduardo, Damilice, kende nan a carga tur nan pasenshi cu mi ta den un staf asina grandi, hunto cu Juby Naar, Aureen Werleman, Django Simoons, Nilton Lacle, Yorleny Oduber, Mercedes Abdul-Hamid. E persona aki mi tin cu bisa cu mi mester a scuche parti di su 23 añanan den Diario ta puntra mi: Robby con bo ta skirbi esaki of bo por scucha e tape aki pasobra mi no ta compronde bon kico nan ta papia". Pero mi tin cu bisa si cu tempo nos a comparti mesun oficina e tabata traha coffie y tee pa mi. Tambe mi coleganan Merry Vrolijk, e reporteronan Nelson Speed Andrade, , Hubert Tiel, Maria Berry, Michael Carty, Gina Burleson, e ultimo aki a soporta masha zundra ora cu mi yega cas bao di un stress. Pero na bosonan tur danki, boso nan tambe ta parti di mi crecimiento como reportero. Tambe mi no por keda sin menciona mi coleganan di administracion y departamento di aviso Miram Alders, Astrid Petrochi, Jeandella Croes, Susette Croes, Irene Croes, Yvonne Tromp, Freddy Barreto, Vivian Maduro, Franklin Peña, Vivian Jeandor, Sussy Maduro, vooral merdia ora di break nan ta malcriami. Tambe mi no por laga afor Charlenne Croes, Glen Gonzaga, Roberto Simoons, Miguel Garcia, Alex Croes, Julien Tromp, Ricardo Jimenez y Raul Valencia, e ultimo aki un ruman completo di mi. Den un palabra grandi: danki na mi coleganan!"